

Na osnovu čl. 64., 71., 96. i 97. Zakona o cestama Federacije Bosne i Hercegovine ("Službene novine Federacije BiH", broj 6/02), Skupština Kantona Sarajevo, na sjednici od 30. juna 2004. godine, donijela je

ODLUKU

O USLOVIMA I NAČINU PROKOPAVANJA JAVNIH POVRŠINA NA PODRUČJU KANTONA SARAJEVO

Član 1.

Ovom odlukom propisuju se uslovi i način prokopavanja javnih površina na području Kantona Sarajevo u svrhu polaganja novih ili zamjene i opravke postojećih podzemnih instalacija, kao i površinske i nadzemne instalacije koje zahtjevaju zahvate u tlu.

Prokopavanjem u smislu odredaba ove odluke, smatra se svaki zahvat na javnoj površini u putnom pojasu i na cesti.

Prokopavanje se vrši u svrhu polaganja novih ili zamjene i opravke postojećih instalacija.

Član 2.

Prokopavanje javnih površina vrši se na osnovu odobrenja nadležne općinske službe ako se radi o sanaciji ili rekonstrukciji postojeće instalacije unutar cestovnog pojasa ili u zaštitnom cestovnom pojasu ili na drugim javnim površinama ili o polaganju novih instalacija izvan cestovnog pojasa ili zaštitnog cestovnog pojasa.

Prokopavanje javnih površina vrši se na osnovu odobrenja Ministarstva prometa i komunikacija - Direkcija za puteve (u daljem tekstu: Direkcija za puteve), ako se polaže nova instalacija unutar cestovnog pojasa ili u zaštitnom cestovnom pojasu.

Nadležna općinska služba odobrenje za vršenje hitnih opravki na postojećim podzemnim instalacijama izdaje na period od 6 (šest) mjeseci, koje prema potrebi može produžiti.

Produženje odobrenja za vršenje hitnih popravaka, nadležna općinska služba odobriće samo u slučaju ako su sve prokopane javne površine u prethodnom periodu dovedene u prvobitno stanje i u propisanom roku, a prema ocjeni nadležnih inspeksijskih organa.

Općinska služba nadležna za izdavanje odobrenja za prokopavanje javne površine dužna je da jedan primjerak odobrenja dostavi Ministarstvu unutrašnjih poslova, Ministarstvu prometa i komunikacija, Kantonalnoj inspekciji za ceste i Kantonalnoj komunalnoj inspekciji.

Član 3.

Rješenje o privremenoj izmjeni režima ili obustavi saobraćaja, za vrijeme izvođenja radova ili hitnih intervencija, izdaje Ministarstvo prometa i komunikacija Kantona Sarajevo (u daljem tekstu: Ministarstvo), na zahtjev investitora.

Član 4.

Prije podnošenja zahtjeva za prokopavanje javnih površina u cilju izgradnje novih instalacija, vlasnik podzemnih instalacija je obavezan pribaviti odobrenje za građenje.

Član 5.

Uz zahtjev za izdavanje odobrenja za građenje podzemnih instalacija potrebno je podnijeti:

- urbanističku saglasnost,

- izvod iz katastra - katastarska čestica,
- dokaz o pravu građenja,
- tri primjerka glavnog projekta,
- pisani izvještaj o obavljenoj kontroli glavnog projekta prema Zakonu o građenju ("Službene novine Federacije BiH", broj 55/02),
- pisani izvještaj i potvrdu o izvršenoj nostrifikaciji u slučajevima iz člana 27. Zakona o građenju, elaborati o istražnim radovima, ako su podaci iz njih poslužili za izradu glavnog projekta, te tehnološki elaborat ako je potreban,
- saglasnosti pribavljene u postupku izdavanja urbanističke saglasnosti za predmetnu građevinu,
- drugi prilozi određeni posebnim zakonom,
- odobrenje Direkcije za puteve (ako se polaganje instalacija vrši u kolovozu ili zaštitnom cestovnom pojasu), a u skladu sa Odlukom o utvrđivanju lokalnih cesta na području Kantona Sarajevo za lokalne ceste koje su od interesa za Kanton Sarajevo,
- katastar podzemnih instalacija,
- ugovor sa Direkcijom za puteve o regulisanoj naknadi korištenja, odnosno nadležnog općinskog organa, ako se radi o cestama u nadležnosti općine, u skladu sa Odlukom o visini i načinu plaćanja naknade za korištenje zemljišta u cestovnom pojasu i drugog zemljišta koje pripada javnim cestama ("Službene novine Federacije BiH", broj 52/02).

Član 6.

Odobrenje za prokopavanje se izdaje na osnovu odobrenja za građenje i rješenja o izmjeni ili ograničenju saobraćaja koji je na snazi za vrijeme izvođenja radova.

Član 7.

Odobrenje za građenje, iz člana 5. ove odluke, izdaje se za:

- izradu novih podzemnih instalacija,
- rekonstrukcije postojećih podzemnih instalacija kada se rekonstrukcijom mijenjaju tehničke karakteristike instalacija (vrsta materijala, prečnik profil itd.)

odnosno, odobrenje za građenje nije potrebno u slučajevima:

- hitne intervencije za sanaciju postojećih podzemnih instalacija;
- opravku postojeće podzemne instalacije kada se ne mijenjaju tehničke karakteristike u odnosu na postojeće instalacije.

Član 8.

Na prokopavanje javnih površina u svrhu polaganja novih ili zamjene i opravke postojećih podzemnih instalacija, primjenjuju se i odredbe Zakona o cestama kojima je regulisano održavanje javnih cesta.

Član 9.

Prokopavanje javnih površina može se odobriti u vremenu od 1. aprila do 1. novembra.

Izuzetno od odredbe prethodnog stava, prokopavanje javnih površina može se vršiti u toku cijele godine:

- u cilju hitnih popravaka kvarova na postojećim podzemnim instalacijama;
- u svrhu polaganja, zamjene i opravke podzemnih instalacija od posebnog interesa za Kanton što se utvrđuje saglasnošću Ministarstva prostornog uređenja i zaštite okoliša, a na zahtjev podnosioca zahtjeva - vlasnika instalacija.

Član 10.

Odobrenje za prokopavanje javnih površina može se izdati samo vlasniku podzemnih instalacija.

Firma koja vrši prokop, a koja je registrovana za tu vrstu djelatnosti, dužna je da na mjestu prokopavanja, na zahtjev ovlaštenog lica za vršenje nadzora, predoči odobrenje i urbanističko-tehničku dokumentaciju za prokopavanje javnih površina. Vlasnik podzemnih instalacija, za sanaciju prokopa kolovoza ili cestovnog pojasa, treba da angažuje jednu od firmi sa kojima Direkcija za puteve ima ugovor o održavanju cesta koji je sklopljen nakon postupka provedenog u skladu sa važećim propisima, ili jednu od firmi sa kojima općina ima ugovor o održavanju cesta koji je sklopljen nakon postupka provedenog u skladu sa važećim propisima, ako se radi o cestama u nadležnosti općine.

Član 11.

Odobrenjem za prokopavanje javnih površina utvrđuje se:

- vlasnik radova,
- period prokopavanja u kojem je izvođač radova dužan sanirati kvar i dovesti prokopanu javnu površinu u prvobitno stanje,
- lokacija - trasa prokopavanja,
- tehnički uslovi za prokopavanje i zatvaranje prokopanih površina,
- prometni uslovi - režim saobraćaja za slučajeve kada općinska služba, nadležna za izdavanje odobrenja za prokopavanje javnih površina, ocijeni da je prethodno potrebno pribaviti rješenje Ministarstva za izmjenu režima saobraćaja.

Član 12.

Uz zahtjev za izdavanje odobrenja za prokopavanje javnih površina vlasnik podzemnih instalacija je dužan podnijeti:

- odobrenje za građenje (za slučajeve u kojima odobrenje za građenje treba prethodno pribaviti);
- kopiju katastarskog plana i katastar podzemnih instalacija, sa ucrtanom novom trasom instalacija ili postojećom trasom, na kojoj se vrši intervencija;
- pismena narudžba firme sa kojom je zaključen ugovor o sanaciji prokopa;
- saglasnost Ministarstva prostornog uređenja i komunalnih poslova, ukoliko se radi o polaganju, zamjeni i opravci podzemnih instalacija od posebnog interesa za Kanton.

Član 13.

Organ nadležan za izdavanje odobrenja za prokopavanje, u slučaju da vlasnik podzemnih instalacija u roku od 72 sata od dana sanacije kvara na podzemnoj instalaciji ne dovede prokopanu površinu u tehnički ispravno stanje, izdat će nalog ovlaštenoj firmi registrovanoj za tu vrstu djelatnosti, da prokopanu površinu dovede u prvobitno ispravno stanje o trošku vlasnika podzemnih instalacija.

Član 14.

Uz zahtjev za prokopavanje javnih površina u periodu od 1. aprila do 1. novembra kao i uz zahtjev za prokopavanje javnih površina, u cilju hitnih intervencija, podnosilac zahtjeva dužan je dostaviti važeći ugovor, zaključen sa jednom od firmi registrovanih za tu vrstu radova, a sa kojom Direkcija za puteve ima ugovor o održavanju cesta, o sanaciji prokopane površine kolovoza ili cestovnog pojasa, a koji je sklopljen nakon postupka provedenog u skladu sa važećim propisima.

Član 15.

Vlasnik podzemnih instalacija je obavezan da vodi evidenciju svih prokopa koji su hitna intervencija i da ih dostavlja nadležnoj općinskoj službi.

Član 16.

Vlasnik podzemnih instalacija je obavezan o početku svake intervencije na javnim površinama u roku od 24 sata da pismeno obavijesti MUP, općinsku službu za komunalne poslove, nadležnu komunalnu inspekciju i putnu inspekciju u slučaju da se radi o prokopu na saobraćajnoj površini (kolovoz, trotoar, parking).

Član 17.

Pri prokopavanju i dovođenju prokopanih površina u prvobitno ispravno stanje, izvođač radova je dužan da se pridržava propisanih prometnih i "Tehničkih uslova za prokopavanje i zatvaranje javnih površina" (HTZ, podgrade, osiguranje iskopa, nasipanje kamenim materijalom, nabijanje nosivog sloja, recepture i debljine nosivog i završnog sloja asfalta).

Član 18.

Izvođač radova dužan je prokopane javne površine dovesti u prvobitno stanje u roku određenom u odobrenju za prokopavanje.

Pri prokopavanju javnih površina u svrhu opravke postojećih podzemnih instalacija izvođač radova je dužan da prokopane površine dovede u prvobitno ispravno stanje, a prema tehničkim uslovima u roku od 72 sata od dana sanacije kvara na podzemnim instalacijama.

Zabranjeno je zatvaranje prokopanih površina prije izvršenog snimanja podzemnih instalacija čije je snimanje obavezno prema odredbama Zakona o katastru komunalnih uređaja.

Snimanje podzemnih instalacija mora se obaviti u roku 24 sata od završetka polaganja instalacija.

Član 19.

Održavanje prokopanih javnih površina iz stava 2. člana 9. ove odluke je obavezno u toku zimskog perioda od 1. novembra do 1. aprila ukoliko se prije ne steknu uslovi za dovođenje prokopane javne površine u ispravno prvobitno stanje i to:

- ugradnjom hladnog asfalta,
- betoniranjem prokopane površine,
- dopunom tamponskim materijalom (sitna frakcija).
- Navedenim radovima se vrši privremena sanacija prokopanih javnih površina dok se ne steknu vremenski uslovi kada će se izvršiti sanacija prokopanih površina prema "Tehničkim uslovima za prokopavanje i zatvaranje javnih površina".

Član 20.

Nadzor nad provođenjem odredaba ove odluke vrši komunalni inspektor i cestovni inspektor i to svaki u okviru svoje nadležnosti. Nadležni komunalni i cestovni inspektori vode evidenciju o kvalitetu sanacija prokopanih javnih površina i dostavljaju je nadležnoj općinskoj službi svakih 6(šest) mjeseci (31.12. i 30.06.), a vezano za produženje izdavanja rješenja za hitne intervencije.

Član 21.

Ako se izvođač radova ne pridržava tehničkih uslova iz člana 17. Odluke, nadležni komunalni i cestovni inspektor obavijestit će nadležnu općinsku službu za pokretanje postupka sanacije prokopane javne površine.

KAZNENE ODREDBE

Član 22.

Novčanom kaznom od 1.500 KM do 3.000 KM kaznit će se za prekršaj vlasnik instalacija, ako na zahtjev ovlaštenog lica za vršenje nadzora na mjestu prokopavanja ne predoči odobrenje za prokopavanje i urbanističko-tehničku dokumentaciju za prokopavanje (čl. 5. i 6.).

Član 23.

Novčanom kaznom od 1.500 KM do 3.000 KM kaznit će se za prekršaj izvođač radova, ako se pri prokopavanju javnih površina ne pridržava "Tehničkih uslova za prokopavanje i zatvaranje javnih površina" (član 17.).

Član 24.

Novčanom kaznom od 1.500 KM do 3.000 KM kaznit će se za prekršaj izvođač radova i vlasnik instalacija, ako javne površine nakon prokopavanja ne dovede u prvobitno stanje u određenom roku i ako ne održava prokope u zimskom periodu (član 19.).

Član 25.

Novčanom kaznom od 1.500 KM do 3.000 KM kaznit će se za prekršaj vlasnik instalacija, ako ne pribavi uslovljenu saglasnost za izmjenu režima saobraćaja (član 11. stav 5.).

Član 26.

Novčanom kaznom od 1.500 KM do 3.000 KM kaznit će se za prekršaj izvođač radova, ako ne izvrši snimanje podzemnih instalacija i ne dostavi snimljenu situaciju nadležnoj službi Zavoda za izgradnju Kantona Sarajevo (član 18. stav 3.).

PRELAZNE I ZAVRŠNE ODREDBE

Član 27.

Danom stupanja na snagu ove odluke prestaje da važi Odluka o uslovima i načinu prokopavanja javnih površina na području Kantona Sarajevo ("Službene novine Kantona Sarajevo", broj 6/97).

Član 28.

Odluka stupa na snagu danom objavljivanja u "Službenim novinama Kantona Sarajevo".

Broj 01-05-17893/04
30. juna 2004. godine
Sarajevo

Predsjedavajuća
Skupštine Kantona Sarajevo
Meliha Alić, s. r.
